

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**Z A K O N
O UPRAVLJANJU DRŽAVNIM KAPITALOM U
PRIVREDNIM DRUŠTVIMA U FEDERACIJI BOSNE I HERCEGOVINE**

Sarajevo, marta 2016. godine

ZAKON

O UPRAVLJANJU DRŽAVNIM KAPITALOM U PRIVREDNIM DRUŠTVIMA U FEDERACIJI BOSNE I HERCEGOVINE

DIO PRVI – OPŠTE ODREDBE

Član 1.

(Predmet zakona)

Ovim zakonom uređuje se: upravljanje državnim kapitalom, osnivanje, vršenje ovlaštenja po osnovu učešća državnog kapitala, administrativna kontrola akata i posebne odredbe o postupku u registrima i to isključivo u privrednim društvima sa učešćem državnog kapitala koja su u nadležnosti Federacije Bosne i Hercegovine (u daljem tekstu: Federacija).

Član 2.

(Ovlaštenja po osnovu učešća državnog kapitala)

(1) U Federaciji ovlaštenja po osnovu učešća državnog kapitala u privrednim društvima vrši Federacija, kantoni, gradovi i opštine u okviru svojih nadležnosti.

(2) U privrednim društvima sa učešćem državnog kapitala u kojim ovlaštenja po osnovu učešća državnog kapitala vrše opštine, gradovi i kantoni, vršenje ovlaštenja po osnovu učešća državnog kapitala svojim propisima uređuju opštine, gradovi i kantoni Federacije (u daljem tekstu: drugi nivoi vlasti), svako u okviru svojih nadležnosti.

Član 3.

(Pojmovi)

Pojedini pojmovi u smislu ovog zakona imaju slijedeće značenje:

a) **federalni organi uprave i federalne upravne organizacije** su organi definisani Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05),

b) **privredno društvo sa učešćem državnog kapitala** je privredno društvo u kojem ovlaštenja po osnovu učešća državnog kapitala vrši Vlada Federacije Bosne i Hercegovine, bez obzira na visinu tog učešća,

c) **privredno društvo sa većinskim učešćem državnog kapitala** je privredno društvo u kojem ovlaštenja po osnovu učešća državnog kapitala vrši Vlada Federacije Bosne i Hercegovine i u čijem osnovnom kapitalu državni kapital učestvuje sa više od 50%,

d) **vršenje ovlaštenja po osnovu učešća državnog kapitala** obuhvata ostvarivanje prava dioničara ili članova privrednih društva sa učešćem državnog kapitala u skladu sa propisima koji uređuju prava i obaveze dioničara i članova privrednih društava,

e) **administrativna kontrola akata** je postupak kontrole usklađenosti odgovarajućih akata privrednih društava sa većinskim učešćem državnog kapitala sa zakonima i podzakonskim aktima,

f) **registri** su Registar poslovnih subjekata koji vode nadležni registarski sudovi u Federaciji, Registar vrijednosnih papira u Federaciji Bosne i Hercegovine i drugi registri u kojim se evidentiraju podaci o privrednim društvima.

DIO DRUGI – VRŠENJE OVLAŠTENJA U PRIVREDNIM DRUŠTVIMA SA UČEŠĆEM DRŽAVNOG KAPITALA

POGLAVLJE I. Osnivanje i način vršenja ovlaštenja u privrednim društvima sa učešćem državnog kapitala

Član 4. (Osnivanje)

(1) Privredno društvo sa 100% učešćem državnog kapitala može se osnovati posebnim zakonom.

(2) Vlada Federacije Bosne i Hercegovine (u daljem tekstu: Vlada Federacije), odlukom može osnovati privredno društvo sa 100% učešćem državnog kapitala, kada ocjeni da je osnivanje takvog privrednog društva od interesa za Federaciju ili za poslovanje privrednih društava sa učešćem državnog kapitala.

Član 5. (Ovlaštenja)

(1) U privrednim društvima sa učešćem državnog kapitala iz nadležnosti Federacije, ovlaštenja po osnovu učešća državnog kapitala vrši Vlada Federacije neposredno ili putem federalnih organa uprave i federalnih upravnih organizacija, ukoliko posebnim zakonom nije drugačije određeno.

(2) Vlada Federacije neposredno vrši ovlaštenja po osnovu učešća državnog kapitala u privrednim društvima sa učešćem državnog kapitala, i to:

- a) učešće u radu i odlučivanju skupštine,
- b) izbor i nominovanje kandidata za imenovanje članova nadzornog odbora i razrješenje dužnosti članova nadzornog odbora,
- c) davanje saglasnosti za imenovanje članova uprave i razrješenje dužnosti članova uprave.

(3) Vlada Federacije, putem federalnih organa uprave i federalnih upravnih organizacija vrši poslove evidentiranja, upravnog nadzora i nadzora općih akata, praćenje rada i monitoring, uz obavezu podnošenja izvještaja Vladi Federacije (u daljem tekstu: nadležni organ).

Član 6. (Lista privrednih društava)

(1) Vlada Federacije odlukom utvrđuje Listu privrednih društava u kojima vrši ovlaštenja na osnovu učešća državnog kapitala iz nadležnosti Federacije (u daljem tekstu: Lista).

(2) Vlada Federacije, odlukom o izmjeni odluke iz stava (1) ovog člana, može vršenje ovlaštenja po osnovu učešća državnog kapitala u privrednom društvu iz nadležnosti Federacije prenijeti na drugi nivo vlasti, uz obavezno pribavljanje prethodne saglasnosti Parlamenta Federacije Bosne i Hercegovine (u daljem tekstu: Parlament Federacije) i nadležnog organa nivoa vlasti na koji se ovlaštenja prenose.

(3) Vlada Federacije, posebnom odlukom o dopuni odluke iz stava (1) ovog člana, može vršenje ovlaštenja po osnovu učešća državnog kapitala u privrednom društvu iz nadležnosti drugih nivoa vlasti prenijeti u nadležnost Federacije, uz obavezno

pribavljanje prethodne saglasnosti Parlamenta Federacije i nadležnog organa nivoa vlasti sa kojeg se ovlaštenja prenose.

(4) Odlukom o izmjeni odluke iz stava (1) ovog člana, Vlada Federacije može privredno društvo brisati sa Liste, ukoliko je privredno društvo prestalo postojati ili je u cijelosti privatizovano.

(5) Odluke iz st. (2) i (3) ovog člana Vlada Federacije može donijeti ukoliko prethodno utvrdi da je prenos vršenja ovlaštenja po osnovu učešća državnog kapitala u privrednom društvu od interesa za Federaciju, drugi nivo vlasti ili za poslovanje privrednih društava sa učešćem državnog kapitala.

Član 7. (Sadržaj Liste)

Lista iz člana 6. ovog zakona, za svako privredno društvo sadrži slijedeće podatke:

- a) firmu i sjedište,
- b) visinu učešća državnog kapitala u osnovnom kapitalu privrednog društva izraženu u postotcima, a za privredna društva organizovana u obliku dioničkog društva izraženu i u broju dionica,
- c) broj članova nadzornog odbora i uprave,
- d) visinu naknada i plaća članova nadzornog odbora i uprave izraženu u broju prosječnih mjesečnih neto plaća isplaćenih u Federaciji u prethodna tri mjeseca prema posljednjem objavljenom podatku Federalnog zavoda za statistiku,
- e) naziv nadležnog organa Federacije koji je ovlašten da u tom privrednom društvu vrši poslove iz člana 5. stav (3) ovog zakona,
- f) i drugo.

POGLAVLJE II. ODLUČIVANJE NA SKUPŠTINI

Član 8. (Punomoćnik)

Pravo učestvovanja u radu i odlučivanju skupštine privrednog društava sa učešćem državnog kapitala Vlada Federacije ostvaruju putem punomoćnika koji je u svemu dužan postupati u skladu sa dobijenim obavezujućim uputstvom Vlade Federacije.

Član 9. (Punomoć)

Vlada Federacije, za svaku sazvanu skupštinu, nakon objave obavještenja o sazivanju skupštine, punomoćniku iz člana 8. ovog zakona daje punomoć u pisanoj formi, koja obavezno sadrži:

- a) naziv i sjedište davaoca punomoći, Vlade Federacije,
- b) ime i prezime punomoćnika, ime jednog roditelja, adresa stanovanja, JMB, broj lične karte i naziv organa koji je izdao ličnu kartu,
- c) dnevni red sazvane skupštine sa obavezujućim uputstvom o načinu glasanja po svakoj pojedinoj tački dnevnog reda, tako da pored svake tačke dnevnog reda mora izričito biti navedeno: „glasati za” ili „glasati protiv” prijedloga odluke ili imena kandidata ili drugi odgovarajući način glasanja,
- d) druga odgovarajuća obavezujuća uputstva koja se odnose na učestvovanje u raspravi,

- e) naznaku da punomoćnik nema ovlaštenje da učestvuje u radu i odlučivanju sazvane skupštine izvan tačkaka dnevnog reda navedenog u punomoći,
- f) broj, mjesto i datum izdavanja punomoći,
- g) potpis punomoćnika i
- h) potpis Premijera i pečat Vlade Federacije.

Član 10.

(Poziv, prijava i punomoć)

- (1) Privredno društvo sa Liste iz člana 6. ovog zakona dužno je Vladi Federacije dostaviti poziv za zakazanu skupštinu sa dnevnim redom i materijalima za svaku tačku dnevnog reda, najkasnije do dana objavljivanja obavještenja o sazivanju skupštine.
- (2) Prijava za učešće u radu skupštine i punomoć za učešće u radu i odlučivanju skupštine društva dostavlja se privrednom društvu sa učešćem državnog kapitala lično, putem pošte, telefaksom ili elektronskom poštom, najkasnije u roku koji je statutom ili odlukom društva utvrđen za registraciju dioničara za učešće u radu skupštine prije dana određenog za održavanje skupštine.
- (3) Punomoćnik je dužan originalni primjerak prijave i punomoći iz stava (2) ovog člana predati Odboru za glasanje, najkasnije neposredno prije početka skupštine.
- (4) Ukoliko punomoć ne sadrži bilo koji dio obaveznog sadržaja iz člana 9. ovog zakona punomoćnik ne može učestvovati u radu i odlučivanju skupštine.

Član 11.

(Opoziv punomoći)

Vlada Federacije može opozvati punomoć ili umjesto već date punomoći dati novu punomoć najkasnije do održavanja skupštine.

POGLAVLJE III. NADZORNI ODBOR

Član 12.

(Postupak izbora)

- (1) Postupak izbora i nominovanja kandidata za imenovanje članova nadzornih odbora ispred državnog kapitala, u skladu sa odredbama Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03, 34/03 i 65/13), pokreće Vlada Federacije odlukom o raspisivanju javnog konkursa.
- (2) Postupak iz stava (1) ovog člana provodi Komisija koju imenuje Vlada Federacije.
- (3) Komisija iz stava (2) ovog člana, nakon okončanog postupka iz stava (1) ovog člana, dužna je sačiniti listu kandidata koji ispunjavaju tražene uslove i zapisnik koji sadrži sve aktivnosti i radnje obavljene od strane Komisije.
- (4) Listu kandidata i zapisnik sa kopijom prijava svih kandidata i dostavljenih dokaza, Komisija je dužna dostaviti Vladi Federacije na izbor i imenovanje.
- (5) Na osnovu liste kandidata iz st. (3) i (4) ovog člana, Vlada Federacije donosi odluku o davanju prethodne saglasnosti skupštini društva za imenovanje članova nadzornog odbora.
- (6) Skupština privrednog društva, u skladu sa odlukom iz stava (5) ovog člana, vrši izbor članova nadzornog odbora.

Član 13.

(Privremeno imenovanje)

(1) Izuzetno, bez provođenja postupka iz člana 12. ovog zakona, u skladu sa odredbama Zakona o ministarskim, vladinim i drugim imenovanjima Federacije Bosne i Hercegovine, Vlada Federacije, može utvrditi prijedlog kandidata za imenovanje vršilaca dužnosti članova nadzornog odbora ispred državnog kapitala koji se imenuju do okončanja postupka iz člana 12. ovog zakona.

(2) Vlada Federacije može vršiti utvrđivanje prijedloga kandidata u skladu sa stavom (1) ovog člana ukoliko ocjeni da je to potrebno radi obezbijeđenja uslova za nesmetan rad i odlučivanje nadzornog odbora privrednog društva do okončanja postupka iz člana 12. ovog zakona.

(3) U skladu sa prijedlogom kandidata iz stava (1) ovog člana, imenovanje vršilaca dužnosti članova nadzornog odbora ispred državnog kapitala vrši skupština privrednog društva do okončanja postupka iz člana 12. ovog zakona, a najduže na period do tri mjeseca, počev od dana stupanja na snagu odluke skupštine o imenovanju vršilaca dužnosti članova nadzornog odbora.

Član 14.

(Smetnje i uslovi za imenovanje)

(1) Kandidat za člana nadzornog odbora privrednog društva ispred državnog kapitala iz čl. 12. i 13. ovog zakona ne može biti lice:

a) za čiji izbor i imenovanje postoje smetnje utvrđene važećim propisima koji regulišu ovu oblast i

b) koje je zaposlenik tog privrednog društva, osim u slučaju kada Vlada Federacije utvrdi da je to od posebnog interesa za određeno privredno društvo, a što zavisi od djelatnosti koju privredno društvo obavlja.

(2) Kandidat za člana nadzornog odbora privrednog društva ispred državnog kapitala iz čl. 12. i 13. ovog zakona, pored ispunjavanja opštih uslova, mora imati najmanje završeno visoko obrazovanje (VSS), najmanje pet godina radnog iskustva u struci nakon završenog visokog obrazovanja i dokaz o završenom odgovarajućem stručnom usavršavanju u skladu sa propisom koji donosi Vlada Federacije.

(3) Aktom o osnivanju i/ili statutom privrednog društva sa učešćem državnog kapitala može se utvrditi potrebno stručno zvanje i iskustvo, a mogu biti utvrđeni i dodatni uslovi za članstvo u nadzornom odboru tog privrednog društva.

Član 15.

(Izveštaji o radu)

(1) U privrednim društvima sa učešćem državnog kapitala, predsjednik i članovi nadzornog odbora imenovani ispred državnog kapitala dužni su postupati u skladu sa interesima vlasnika kapitala.

(2) U privrednim društvima sa većinskim učešćem državnog kapitala predsjednik nadzornog odbora dužan je Vladi Federacije i nadležnom organu iz člana 5. stav (3) ovog zakona blagovremeno, a najmanje jednom u tri mjeseca, dostavljati pisani izvješta o radu nadzornog odbora.

(3) U privrednim društvima u kojim učešće državnog kapitala nije većinsko, izvještaje iz stava (2) ovog člana dužan je dostavljati član nadzornog odbora imenovan ispred državnog kapitala.

Član 16.
(Razrješenje)

(1) Razrješenje dužnosti jednog, više ili svih članova nadzornih odbora privrednih društava imenovanih ispred državnog kapitala vrši skupština privrednog društva na osnovu prethodne saglasnosti Vlade Federacije.

(2) Članu nadzornog odbora koji je imenovan umjesto razriješenog člana, kada se ne razrješava cijeli nadzorni odbor, mandat traje do isteka mandata člana nadzornog odbora koji su imenovani prilikom imenovanja cijelog nadzornog odbora, a nisu razriješeni.

Član 17.
(Ocjena rezultata rada)

(1) Ukoliko ocjeni da rezultati poslovanja privrednog društva sa većinskim učešćem državnog kapitala nisu zadovoljavajući, Vlada Federacije može donijeti odluku o davanju prethodne saglasnosti za smanjenje mjesečne naknade predsjedniku i članovima nadzornog odbora.

(2) Odlukom iz stava (1) ovog člana utvrđuje se smanjeni iznos mjesečne naknade i period za koji će predsjedniku i članovima nadzornog odbora biti isplaćivana naknada u smanjenom iznosu.

(3) U skladu sa odlukom Vlade Federacije iz stava (1) ovog člana, skupština privrednog društva sa većinskim učešćem državnog kapitala donosi odluku o smanjenju mjesečne naknade predsjedniku i članovima nadzornog odbora.

Član 18.
(Primopredaja)

Član nadzornog odbora imenovan ispred državnog kapitala, kojem je mandat istekao ili je razriješen dužnosti prije isteka mandata, dužan je Vladi Federacije i nadležnom organu iz člana 5. stav (3) ovog zakona dostaviti izvještaj o radu.

Član 19.
(Sindikata)

(1) U privrednim društvima sa većinskim učešćem državnog kapitala, pored predsjednika i članova nadzornog odbora, sjednicama nadzornog odbora može prisustvovati i predstavnik sindikata tog privrednog društva, o čemu odlučuje predsjednik nadzornog odbora.

(2) Kada nadzorni odbor odlučuje o pitanjima koja se odnose na zaposlenike privrednog društva, predstavnik sindikata iz stava (1) ovog člana, u cilju zaštite interesa zaposlenika, može iznositi prijedloge, davati pojašnjenja ili na drugi način učestvovati u raspravi na sjednicama nadzornog odbora, s tim da ne može glasati prilikom donošenja odluka nadzornog odbora.

POGLAVLJE IV. UPRAVA

Član 20.
(Postupak izbora)

(1) Izbor kandidata za članove uprave privrednog društva sa većinskim učešćem državnog kapitala vrši organ utvrđen statutom tog privrednog društva (u daljem tekstu: nadležni organ privrednog društva) na osnovu objavljenog javnog konkursa u skladu sa opštim i posebnim uslovima utvrđenim zakonom i statutom privrednog društva.

(2) Kandidat za člana uprave privrednog društva mora imati najmanje završeno visoko obrazovanje (VSS), najmanje pet godina radnog iskustva u struci nakon završenog visokog obrazovanja i dokaz o završenom odgovarajućem stručnom usavršavanju u skladu sa propisom koji donosi Vlada Federacije.

(3) Nakon okončanog postupka izbora kandidata u skladu sa stavom (1) ovog člana nadležni organ privrednog društva sačinjava i dostavlja Vladi Federacije listu kandidata koji ispunjavaju tražene uslove i zapisnik koji sadrži sve aktivnosti i radnje obavljene od strane nadležnog organa.

(4) Vlada Federacije, na osnovu liste kandidata iz stava (3) ovog člana donosi odluku o davanju prethodne saglasnosti nadležnom organu društva za imenovanje članova uprave.

(5) U skladu sa odlukom Vlade Federacije kojom je data prethodna saglasnost za imenovanje članova uprave, nadležni organ privrednog društva donosi odluku o imenovanju članova uprave.

Član 21.

(Privremeno imenovanje)

(1) Izuzetno, bez provođenja postupka iz člana 20. ovog zakona, Vlada Federacije može donijeti odluku o davanju prethodne saglasnosti za razrješenje dužnosti člana uprave i odluku o davanju prethodne saglasnosti za imenovanje vršilaca dužnosti člana uprave privrednog društva sa većinskim učešćem državnog kapitala.

(2) Vlada Federacije može donijeti odluku u skladu sa stavom (1) ovog člana ukoliko ocjeni da je to potrebno radi obezbijeđenja uslova za nesmetano funkcionisanje uprave privrednog društva do okončanja postupka iz člana 20. ovog zakona.

(3) U skladu sa odlukom Vlade Federacije iz stava (1) ovog člana, nadležni organ privrednog društva sa većinskim učešćem državnog kapitala dužan je donijeti odluku o razrješenju i odluku o imenovanju vršioca dužnosti člana uprave društva na period do okončanja postupka iz člana 20. ovog zakona, a najduže na period do šest mjeseci, počev od dana stupanja na snagu odluke nadležnog organa o imenovanju vršioca dužnosti člana uprave.

Član 22.

(Razrješenje)

(1) Razrješenje dužnosti jednog, više ili svih članova uprave privrednih društava sa većinskim učešćem državnog kapitala vrši nadležni organ privrednog društva na osnovu prethodne saglasnosti Vlade Federacije.

(2) Članu uprave privrednog društva sa većinskim učešćem državnog kapitala koji je imenovan umjesto razriješenog člana, u slučaju kada se ne razriješava cijela uprava privrednog društva, mandat traje do isteka mandata članova uprave privrednog društva koji su imenovani prilikom imenovanja cijele uprave privrednog društva, a nisu razriješeni.

Član 23.

(Ocjena rezultata rada)

(1) Ukoliko ocjeni da rezultati poslovanja privrednog društva sa većinskim učešćem državnog kapitala nisu zadovoljavajući, Vlada Federacije može donijeti odluku o davanju prethodne saglasnosti za smanjenje mjesečnih plaća članova uprave.

(2) Odlukom iz stava (1) ovog člana utvrđuje se smanjeni iznos mjesečnih plaća članova uprave i period za koji će članovima uprave biti isplaćivana plaća u smanjenom iznosu.

(3) U skladu sa odlukom Vlade Federacije iz stava (1) ovog člana, nadležni organ privrednog društva sa većinskim učešćem državnog kapitala donosi odluku o smanjenju mjesečnih plaća članova uprave.

Član 24.
(Primopredaja)

Član uprave privrednog društva sa većinskim učešćem državnog kapitala kojem je mandat istekao ili je razrješen dužnosti prije isteka mandata dužan je uz prisustvo komisije koji imenuje nadzorni odbor društva izvršiti primopredaju dužnosti u roku i na način kako je to utvrđeno aktom Vlade Federacije ili aktom nadležnog organa tog privrednog društva.

DIO TREĆI – EVIDENCIJA I ADMINISTRATIVNA KONTROLA AKATA

Član 25.
(Evidencije)

(1) Privredna društava sa većinskim učešćem državnog kapitala, dužna su Vladi Federacije i nadležnom organu iz člana 5. stav (3) ovog zakona, radi evidencije dostavljati obavještenja o značajnim događajima za privredno društvo, i to: o namjeri osnivanja drugih privrednih društava samostalno ili zajedno sa drugim pravnim ili fizičkim licima, namjeri vršenja statusnih promjena, obustavljanju proizvodnje, blokadi računa, štrajku i drugim značajnijim događajima utvrđenim statutom privrednog društva.

(2) Privredna društava sa većinskim učešćem državnog kapitala, dužna su odmah, a najkasnije u roku od tri dana od dana donošenja, Vladi Federacije i nadležnom organu iz člana 5. stav (3) ovog zakona, radi vođenja evidencije dostaviti primjerak: odluke o razrješenju i imenovanju članova nadzornog odbora i članova uprave, odluke o razrješenju i imenovanju članova nadzornog odbora i članova uprave zavisnih društava, polugodišnji i godišnji seta finansijskih izvještaja i godišnji konsolidovani finansijski izvještaj.

(3) Privredna društva sa većinskim učešćem državnog kapitala, dužna su dostavljati podatke iz st. (1) i (2) ovog člana i za privredna društva u čijem osnovnom kapitalu imaju više od 50% dionica ili udjela.

Član 26.
(Administrativna kontrola)

Privredna društava sa većinskim učešćem državnog kapitala, radi administrativne kontrole akata, dužna su nadležnom organu iz člana 5. stav (3) ovog zakona dostavljati statut i druge akte predviđene propisom iz člana 28. stav (4) ovog zakona i sve izmjene i dopune ovih akata.

Član 27.
(Rokovi)

(1) Privredna društava sa većinskim učešćem državnog kapitala, dužna su nadležnom organu iz člana 5. stav (3) ovog zakona, radi administrativne kontrole akata, dostavljati akte iz člana 26. ovog zakona najkasnije 15 dana od dana stupanja na snagu tih akata.

(2) Akte iz člana 26. ovog zakona koji su doneseni prije stupanja na snagu ovog zakona, privredna društava sa većinskim učešćem državnog kapitala dužna su

uskладiti sa odredbama ovog zakona i radi administrativne kontrole akata dostaviti nadležnom organu iz člana 5. stav (3) ovog zakona, najkasnije šest mjeseci od dana stupanja na snagu ovog zakona.

Član 28.
(Postupak)

(1) Administrativnu kontrolu akata privrednog društava sa većinskim učešćem državnog kapitala vrši nadležni organ iz člana 5. stav (3) ovog zakona.

(2) Nadležni organ Federacije iz stava (1) ovog člana, nakon provedenog postupka administrativne kontrole akata, daje pismeno mišljenje o usklađenosti odgovarajućeg akta sa zakonima i podzakonskim aktima.

(3) Ukoliko mišljenje iz stava (2) ovog člana sadrži primjedbe na kontrolisani akt, privredno društvo sa većinskim učešćem državnog kapitala, dužno je u ostavljenom roku otkloniti iznesene primjedbe ili dostaviti obrazloženje o razlozima radi kojih primjedbe nije moguće otkloniti u ostavljenom roku.

(4) Postupak vršenja administrativne kontrole akata, spisak akata privrednih društava koji su predmet kontrole, rokovi za postupanje i druga pitanja u vezi administrativne kontrole akata utvrđuju se propisom koji donosi Vlada Federacije na prijedlog Federalnog ministarstva energije, rudarstva i industrije.

DIO ČETVRTI – POSEBNE ODREDBE O POSTUPKU ZA UPIS I PROMJENU PODATAKA U REGISTRIMA

Član 29.
(Promjene u registrima)

Registri koji pored ostalih podataka evidentiraju i podatke koji se odnose na nadzorne odbore i uprave privrednih društava sa većinskim učešćem državnog kapitala, evidentiranje prvog imenovanja i svakog novog imenovanja i razrješenja članova nadzornih odbora i uprava ovih privrednih društava mogu vršiti isključivo ukoliko podnosilac zahtjeva za evidentiranje promjena pored ostalih potrebnih dokumenata dostavi i odgovarajući akt Vlade Federacije iz čl. 12., 13., 16., 20., 21. i 22. ovog zakona.

DIO PETI – KAZNE NE ODREDBE

Član 30.
(Kaznene odredbe za privredno društvo i odgovorno lice)

(1) Za prekršaj kaznit će se novčanom kaznom u iznosu od 500,00 KM do 7.000,00 KM, privredno društvo u kojem ovlaštenja po osnovu učešća državnog kapitala vrši Vlada Federacije, koje ne dostavi poziv za zakazanu skupštinu sa dnevnim redom i materijalima za svaku tačku dnevnog reda u skladu sa članom 10. stav (1) ovog zakona.

(2) Za prekršaj iz stava (1) ovog člana kaznit će se i odgovorno lice u privrednom društvu novčanom kaznom u iznosu od 50,00 KM do 2.000,00 KM.

Član 31.

(Kaznene odredbe za člana nadležnog organa)

Za prekršaj kaznit će se novčanom kaznom u iznosu od 200,00 KM do 3.000,00 KM, član nadležnog organa privrednog društva u kojem ovlaštenja po osnovu učešća državnog kapitala vrši Vlada Federacije, imenovan ispred državnog kapitala koji postupi protivno čl. 20., 21., 22. i 23. ovog zakona.

Član 32.

(Kaznene odredbe za člana uprave)

Za prekršaj kaznit će se novčanom kaznom u iznosu od 500,00 KM do 5.000,00 KM, član uprave privrednog društva sa većinskim učešćem državnog kapitala koji ne izvrši primopredaju dužnosti u skladu sa članom 24. ovog zakona.

DIO ŠESTI – PRELAZNE I ZAVRŠNE ODREDBE

Član 33.

(Nadzor)

Nadzor nad provođenjem ovog zakona vrši Vlada Federacije.

Član 34.

(Rok za usklađivanje)

Privredna društva u kojim ovlaštenja po osnovu učešća državnog kapitala vrši Vlada Federacije dužna su uskladiti odredbe statuta sa ovim zakonom u roku od 90 dana od dana stupanja na snagu ovog zakona.

Član 35.

(Primjena drugih propisa)

Na pitanja koja nisu regulisana ovim zakonom primjenjuju se odredbe Zakona o privrednim društvima („Službene novine Federacije BiH“, broj 81/15) i Zakona o javnim preduzećima („Službene novine Federacije BiH“, br. 8/05, 81/08, 22/09 i 109/12).

Član 36.

(Propisi)

Vlada Federacije, dužna je donijeti propis iz člana 28. stav (4) ovog zakona, najkasnije u roku od 90 dana od dana stupanja na snagu ovog zakona.

Član 37.

(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Federacije BiH“.